



"DŽAFEROVIĆ" DRUŠTVO SA
OGRANIČENOM ODGOVORNOŠĆU ZA
REVIZIJU, RAČUNOVODSTVO I
FINANSIJSKI KONSALTING d.o.o. Sarajevo
Branilaca Sarajeva 5/III

Broj: 1624/07

Datum, 18.09.2007. godine

**STRANKA DEMOKRATSKE
AKCIJE**

Mehmeda Spahe br. 14

Sarajevo

**IZVJEŠTAJ O OBAVLJENOJ REVIZIJI
PODUDARNOSTI**

DIREKTOR

Nedžad Grcić, dipl.ecc.





"DŽAFEROVIĆ" DRUŠTVO SA OGRANIČENOM
ODGOVORNOŠĆU ZA REVIZIJU, RAČUNOVODSTVO
I FINANSIJSKI KONSALTING d.o.o. SARAJEVO
Branilaca Sarajeva 5/III

Na osnovu člana 3. i 14. Zakona o računovodstvu i reviziji u Federaciji Bosne i Hercegovine ("Sl. novine FBiH", br. 32/05) ovlašteni revizori društva za reviziju, računovodstvo i finansijski konsalting «Džaferović» d.o.o. Sarajevo, izvršili su reviziju podudarnosti sa zakonskim propisima obaveza Stranke demokratske akcije prema dobavljaču «HOLIDAY INN» Sarajevo na dan 31.12.2004. godine i primljenih novčanih priloga pojedinih pravnih lica, te sačinjavaju:

IZVJEŠTAJ O OBAVLJENOJ REVIZIJI PODUDARNOSTI

Obavili smo reviziju podudarnosti računovodstvenog obuhvatanja obaveza Stranke demokratske akcije (u daljem tekstu: Stranka) prema dobavljaču «HOLIDAY INN» Sarajevo za izvršene usluge na dan 31.12.2004. godine, i priloga pravnih lica «TELOPTIC» d.o.o. Sarajevo, «ALMY» d.o.o. Zenica i «UNIGRADNJA» d.d. Sarajevo u 2004. godini, čija je svrha utvrđivanje usklađenosti sa Zakonom o finansiranju političkih stranaka («Sl. glasnik BiH», br. 22/00) i provedbenim propisima, Kodeksom računovodstvenih načela i Računovodstvenim standardima FBiH («Sl. novine FBiH», broj 50/98, 52/99, 11/00, 54/00). Odgovornost za evidentiranje i iskazivanje obaveza prema navedenom dobavljaču i prihoda od novčanih priloga u finansijskim izvještajima snosi menadžment Stranke. Naša odgovornost svodi se na izražavanje mišljenja o usklađenosti knjigovodstvene evidencije sa zakonskim propisima i njihove prezentacije u finansijskim izvještajima Stranke u revidiranom periodu na temelju provedene revizije.

Reviziju smo obavili u skladu s općeprihvaćenim međunarodnim revizijskim standardima. Ti standardi zahtijevaju planiranje i obavljanje revizije tako da ona pruža razumno uvjerenje o tome ima li u finansijskim izvještajima značajnih grešaka. Revizijom je obuhvaćeno ispitivanje, na bazi testova, dokaza koji potkrepljuju iznose i objavljivanja u finansijskim izvještajima. Revizija također obuhvata primjenu računovodstvenih načela, te značajne procjene uprave, kao i vrednovanje sveukupne prezentacije finansijskih izvještaja. Zbog prirode testa i drugih inherentnih ograničenja revizije, zajedno sa inherentnim ograničenjima računovodstvenog sistema i sistema interne kontrole, postoji neizbježivi rizik da čak i neka značajna pogrešna iznošenja činjenica mogu ostati neotkrivena. Na osnovu izvršene revizije vjerujemo da je provedena procedura pouzdani temelj za izražavanje našeg mišljenja.

Na osnovu provedene revizije **mišljenja smo:**

1. Prihodi Stranke po osnovu novčanih priloga pravnih lica «TELOPTIC» d.o.o. Sarajevo, «ALMY» d.o.o. Zenica i «UNIGRADNJA» d.d. Sarajevo u 2004. godini prekoračeni su za 720,00 KM od limita propisanog članom 5. Zakona o finansiranju političkih stranaka.

IZVJEŠTAJ O OBAVLJENOJ REVIZIJI PODUDARNOSTI

2. Obaveza prema dobavljaču «HOLIDAY INN» Sarajevo, u iznosu od 34.267,00 KM, nastala je prije donošenja Zakona o finansiranju političkih stranaka, a odnosi se na usluge izvršene po fakturama iz 1996. godine.

3. Obaveze prema dobavljaču «HOLIDAY INN» Sarajevo, na dan 31.12.1999. godine, shodno odredbama člana 374. Zakona o obligacionim odnosima, su zastarjele prije stupanja na snagu Zakona o finansiranju političkih stranaka.

4. Potraživanje od Stranke u iznosu od 34.257,00 KM koje se odnosi na 1996. godinu dobavljač «Holiday Inn» Sarajevo je otpisao 31.12.1996. godine indirektnom metodom na teret rashoda perioda, što bi se u smislu člana 4. Zakona o finansiranju političkih stranaka, da je isti tada bio na snazi, moglo smatrati prilogom Stranci. Isknjižavanje već otpisanog potraživanja ne predstavlja štetu (rashod) za «Holiday Inn», već gašenje analitičke evidencije otpisanog potraživanja (219/212). S tim u vezi, isknjižavanje otpisanog potraživanja od strane «Holiday Inn-a» u 2004. godini ne može predstavljati prilog u smislu člana 4. navedenog Zakona, jer isto ne predstavlja poklon, besplatne usluge, niti pružanje usluge stranci pod uslovima kojima se ta stranka stavlja u povlašten položaj u odnosu na druge.

5. Obaveze prema dobavljaču «HOLIDAY INN» Sarajevo nastale 1996. godine, a koje su u poslovnim knjigama Stranke otpisane u 2005. godini, ne mogu predstavljati prilog Stranci za 2004. godinu (niti drugu godinu nakon 31.12.1996. godinu). jer je otpisom potraživanja na dan 31.12.1996. godine za izvršene usluge u 1996. godini od strane «Holiday Inn-a» Sarajevo, izvršena besplatna usluga Stranci kada nije postojao Zakon o finansiranju političkih stranaka.

Preporučujemo Stranci demokratske akcije da u cilju zaštite svojih interesa protiv Odluke Centralne izborne komisije broj 01-07-6-1728-1/07 od 13.09.2007. godine podnese žalbu Apelacionom odjelu Suda Bosne i Hercegovine.

Reviziju su obavili Ovlašteni revizori:

Ismet Ramović, broj sertifikata 3050/1

Enver Beganović, broj sertifikata 4412/1

“Džaferović” d.o.o. Sarajevo



STRANKA DEMOKRATSKE AKCIJE
Revizija podudarnosti

I OPĆI PODACI

Stranka demokratske akcije (skraćeni naziv: SDA) je osnovana i upisana u registar udruženja Rešenjem Višeg suda u Sarajevu broj R-I-7/90 od 13.06.1990. godine. Rješenjem Kantonalnog suda u Sarajevu broj R-I-7/01 od 16.01.2002. godine u sudski registar su upisane promjene statuta, programa i predsjednika stranke.

Sjedište stranke je u Sarajevu, u Ulici Mehmeda Spahe br. 14. Osoba ovlaštena za zastupanje i predstavljanje stranke je Sulejman Tihić, predsjednik SDA. Osoba ovlaštena za podnošenje izvještaja u 2004. godini je Timur Numić, direktor Centrale SDA.

Teritorijalnu organizaciju SDA čine:

- Centrala SDA
- 6 regionalnih odbora
- 9 kantonalnih odbora
- Gradski odbor Mostar
- SDA Brčko Distrikt
- 122 općinska odbora.

U okviru stranke djeluju:

- Asocijacija mladih SDA
- Asocijacija žena SDA
- Asocijacija "Fatma" koja brine o odgoju i obrazovanju djece bez roditelja, a posebno djece šehida i poginulih boraca
- Fond za stipendiranje nadarenih učenika i studenata "FONUS" (ima svojstvo pravnog lica).

U izvještajnom periodu SDA je poslovala preko 106 transakcijskih računa otvorenih kod 21 banke. U istoj godini su ugašena 2 transakcijska računa. Općinski odbor Livno je poslovao preko transakcijskog računa Kantonalnog odbora Livanjskog kantona. Trideset i tri organizacione jedinice nemaju otvorene transakcijske račune. Općinski odbor Olovo je vodio sudski spor sa povjeriocima, pa je žiro-račun istog blokirao sudskim rješenjem.

STRANKA DEMOKRATSKE AKCIJE
Revizija podudarnosti

II ODLUKA CENTRALNE IZBORNE KOMISIJE O IZRICANJU NOVČANE KAZNE

Prema Odluci Centralne izborne komisije broj 01-07-6-1728-1/07 od 13.09.2007. godine Stranka demokratske akcije odgovorna je što je u 2004. godini primila priloge od pravnih lica iznad Zakonom dozvoljenog limita u ukupnom iznosu od 30.937,00 KM, čime je prekršila odredbu člana 5. stav 1. Zakona o finansiranju političkih stranaka, pa joj se na osnovu navedene zakonske odredbe i primjene člana 15. stav 2. Zakona o finansiranju političkih stranaka izriče novčana kazna u iznosu od 34.000,00 KM.

U obrazloženju Odluke, pored ostalog, navedeno je slijedeće:

«Revizijom je utvrđeno da je Stranka demokratske akcije u kontrolisanom periodu primila novčane priloge, od pravnih lica i to:

- «Teloptic» d.o.o. Sarajevo,
- «ALMY» d.o.o. Zenica i
- «Unigradnja» d.d. Sarajevo,

svi po 4.280 KM, odnosno za po 240 KM više od limita, što ukupno iznosi 720 KM više od zakonskog limita i što ova politička stranka u svojoj žalbi nije ni negirala.

Takođe je revizijom utvrđeno da je ova politička stranka primila prilog od pravnog lica, odnosno besplatne usluge otpisivanjem duga i to od pravnog lica:

- «HOLIDAY INN» Sarajevo – otpis duga za pružene usluge u iznosu od 34.257,00 KM što je za 30.217,00 KM više od limita, a što je nesporno utvrđeno na osnovu Odluke pravnog lica «Holiday Inn» broj: 3911/04 od 22.10.2004. godine kojom iz poslovnih knjiga ovog pravnog lica isknjižavaju potraživanja u ukupnom iznosu od 34.257,00 KM, čime je navedena politička stranka u 2004. godini, u vrijeme važenja Zakona o finansiranju političkih stranaka, primila prilog od ovog pravnog lica veći od zakonom dozvoljenog limita. Isto tako, navedene obaveze ove političke stranke prema navedenom pravnom licu nisu iskazane u obrascu 5. godišnjeg finansijskog izvještaja Stranke demokratske akcije za 2004. godinu, na dan 31.12.2004. godine, što ukazuje da je ova politička stranka primila navedeni prilog u 2004. godini.

...

Iz navedenog proizilazi da prilozi Stranke demokratske akcije primljeni u 2004. godini od sva četiri pravna lica ukupno iznose 30.937,00 KM više od dozvoljenog iznosa, odnosno limita.»

STRANKA DEMOKRATSKE AKCIJE
Revizija podudarnosti

III BILJEŠKE O NOVČANIM PRILOZIMA I OBAVEZAMA

1. NOVČANI PRILOZI

U 2004. godini Stranka je, pored ostalih, primila novčane priloge od pravnih lica, i to:

R.br.	Naziv pravnog lica	Datum	Broj izvoda	Iznos KM
1	«TELOPTIC» d.o.o. Sarajevo	15.09.2004.	24	4.280,00
2	«ALMY» d.o.o. Zenica	17.09.2004.	25	4.280,00
3	«UNIGRADNJA» d.d. Sarajevo	06.10.2004.	29	4.280,00
Ukupno:				12.840,00

Navedeni prilozima veći su od limita propisanog članom 5. Zakona o finansiranju političkih stranaka u iznosu od po 240,00 KM. Naime, visina jednokratnog priloga ne smije premašiti osam prosječnih plaća prema zvaničnim podacima Agencije za statistiku BiH u jednoj kalendarskoj godini. Prosječna plaća za period I-VIII 2004. godine iznosila je 505,00 KM, tako da je maksimalni prilog mogao iznositi 4.040,00 KM, odnosno 12.120,00 KM. Novčani prilozima po ovom osnovu u 2004. godini prekoračeni su za 720,00 KM.

2. OBAVEZE PREMA DOBAVLJAČU «HOLIDAY INN» Sarajevo

Prema knjigovodstvenoj evidenciji Stranke obaveze prema dobavljaču «HOLIDAY INN» Sarajevo na dan 31.12.2004. godine iznosile su 36.359,00 KM, a sastoje se od:

- obaveza iz 1996. godine 34.267,00 KM
- obaveza iz 2001. godine 1.420,00 KM
- obaveza iz 2004. godine 672,00 KM

U posmatranom periodu obaveze prema «HOLIDAY INN» Sarajevo u poslovnim knjigama Stranke su iskazivane u iznosima:

- 31.12.1999. godine (obaveze iz 1996. godine) 34.267,00 KM
- 31.12.2000. godine 34.267,00 KM
- 31.12.2001. godine 35.687,00 KM
- 31.12.2002. godine 35.687,00 KM
- 31.12.2003. godine 35.687,00 KM
- 31.12.2004. godine 36.359,00 KM

Obaveze iz 1996. godine

Iz sadržaja dopisa broj: 3437/07-2 od 06.09.2007. godine, koji je od strane «Holiday Inn-a» Sarajevo upućenog Centralnoj izbornoj komisiji u predmetu: «Dostava dokumentacije vezano za dopis br. 3437/07-1 od 05.09.2007. godine, a u vezi Vašeg Zahtjeva br. 09-07-6-1728-2/07 od 31.08.2007. g.», vidljivo je da je potraživanje od Stranke demokratske akcije u iznosu od 34.257,00 KM otpisano u 1996. godini («dugovanje prebačeno na sumnjiva i sporna potraživanja te otpisano kao nenaplativo (1.1.-31.12.1996. g.- napravljena ispravka vrijednosti – teretili poslovanje»).

STRANKA DEMOKRATSKE AKCIJE
Revizija podudarnosti

U obrazloženju Odluke, na strani 2., pored ostalog, ističe se: ... a što je nesporno utvrđeno na osnovu Odluke pravnog lica «Holiday Inn» broj: 3911/04 od 22.10.2004. godine, kojom iz poslovnih knjiga ovog pravnog lica **isknjižavaju** potraživanja prema Stranci demokratske akcije zatvaranjem konta ispravke vrijednosti i potraživanja (konto **219/212**) u ukupnom iznosu od 34.257,00 KM...»

Iz citiranog dopisa i obrazloženja Odluke CIK-a nedvosmisleno proizilazi slijedeće:

1. Potraživanje od Stranke u iznosu od 34.257,00 KM koje se odnosi na 1996. godinu dobavljač «Holiday Inn» Sarajevo je **otpisao 31.12.1996. godine na teret rashoda perioda**, što je u svojim poslovnim knjigama evidentirao indirektnom metodom, tj. uz upotrebu konta ispravke vrijednosti potraživanja. Na ovaj način zadržana je analitička evidencija potraživanja od Stranke, koje je inače otpisano (rashod po osnovu otpisa potraživanja / ispravka vrijednosti potraživanja) i kao takvo ne predstavlja potraživanje (potraživanja od kupaca / ispravka vrijednosti potraživanja) i ne iskazuje se u bilansu stanja. Otpis potraživanja negativno se odrazio na poslovni rezultat «Holiday Inn-a» Sarajevo u bilansu uspjeha za 1996. godinu, što je rezultiralo smanjenjem imovine «Holiday Inn-a» Sarajevo u obliku potraživanja od kupaca u bilansu stanja na dan 31.12.1996. godine.
2. Potraživanje od Stranke u iznosu od 34.257,00 KM dobavljač «Holiday Inn» Sarajevo je definitivno **isknjižio** (koje je otpisano 1996. godine) iz poslovnih knjiga na dan 31.12.2004. godine na osnovu navedene odluke, knjigovodstvenim stavom 219/212, čime su ova konta ugašena. Isknjižavanje otpisanog potraživanja ni na koji način nije uticalo na poslovni rezultat 2004. godine, niti je umanjilo imovinu «Holiday Inn-a» Sarajevo.

Obaveze iz 2001. i 2004. godine

Obaveze u iznosu od 1.420,00 KM odnose se na račune u iznosu od 1.000,00 KM i 420,00 KM, koji su evidentirani dva puta: prvi put u 2001. godini i drugi put u 2002. godini, kada su isti plaćeni.

Prema poslovnim knjigama Stranke na dan 31.12.2004. godine ukupna obaveza Stranke prema dobavljaču «HOLIDAY INN» Sarajevo iznosi 36.359,00 KM. S obzirom da do 31.12.2004. godine dobavljač nije Stranci poslao pismenu opomenu za plaćanje duga po računima ispostavljenim do 31.12.1999. godine, nije dostavio obavijest o otpisu ovih potraživanja, niti je Stranka obaviještena od strane suda o eventualno podignutoj tužbi na ovaj iznos, iznos obaveze iz 1996. godine od 34.267,00 KM, u skladu sa računovodstvenim propisima (paragraf 66. tačka b. Kodeksa računovodstvenih načela) i Zakonom o obligacionim odnosima i dalje predstavlja obavezu prema ovom dobavljaču, koja je kao takva ispravno iskazivana u poslovnim knjigama Stranke i finansijskim izvještajima Stranke sve do njenog otpisa u 2005. godini.

